

Incumbensa Widmer (Favugn) concernent la creaziun d'in concept chantunal general per mesiras preventivas cunter il littering en il chantun Grischun

Il chantun Grischun è in chantun turistic. Particularmain la stad 2020 ha il turissem gì grond success. L'autra vart dal success è però adina dapli littering (laschar enavos il rument) en consequenza da las bunas frequenzas. Quai chaschuna grondas consequenzas economicas (nettegiament sin donn e cust dal maun public), agriculas e visualas evidentas. Spezialmain en il turissem èsi decisiv che nus tegnian netta nosa natira, perquai che in dals motivs che vegnan numnads il pli savens per ina dimora en noss chantun è la natira intacta.

Ina buna pussaivladad per cumbatter cunter littering èn mesiras preventivas. Cun ina sensibilisaziun sistemática po oravant tut la populaziun indigena vegnir rendida attenta a quest tema. Betg sco ultim è la scola in lieu ideal per infurmar detagliadamain ils uffants ed ils giuvenils. Bleras vischnancas prendan questa via. In tractament chantunal concordant manca però en blers lieus – er en il chantun Grischun. Anzi, ozendi èn quai oravant tut uniuns, persunas privatas e parts interessadas che porschan maun per cumbatter cunter littering e che inizieschan mesiras preventivas. Uschia sensibilisescha per exempel la «Cuminanza d'interess per in ambient net (IGSU)» fundada da vart privata per quest tema cun in di da far urden (clean-up-day) che ha lieu mintga onn. Blers manaschis agriculs rendan er attent a quest problem cun atgnas ideas e cun campagnas naziunalas (www.landwirtschaft.ch) per proteger lur animals cunter malsognas chaschunadas dal rument. En territoris turistics frequentads fermamain pudessan ins eventualmain er lavurar cun rangers che pudessan sensibilisar ed infurmar la glieud en moda e maniera simpatica en chaussa.

Ina segunda via per cumbatter cunter littering è quella da stgaffir ina basa legala. Er sch'in surpassament dals uschenumnads delinquents da rument è fitg difficil da cumprovar, pudessan multas tuttina cuntanscher in effect exemplaric. Plinavant datti ina tscherta controlla vicendaivla da tut las persunas che utiliseschan la natira. Gist là, nua che giasts da vacanzas e turists extrachantunals èn il public en mira, gidan mesiras da prevenziun main che tar la populaziun indigena. Grazia ad ina lescha da polizia communal ha han tschertas vischnancas svizras ozendi la pussaivladad da chastiar delinquents da rument. Ma er qua manca en il chantun Grischun in proceder coordinà.

In'execuziun chantunala cuminaivla fiss giavischabla per che tut las vischnancas possian applitgar la medema basa envers delinquents da rument. Reagì en moda positiva sin talas soluziuns unifitgadas ha la Regenza grischuna gia l'onn 2016 avant la debatta davart l'iniziativa parlamentara (Jacques Bourgeois) «Rinforzar las mesiras cunter il laschar enavos ruments (littering)» en il Cussegl naziunal e vesa il project sco «*in pass impurtant per concluder ina regulaziun unitara e definitiva per l'entira Svizra davart il scumond da bittar davent e da laschar enavos ruments chasans*». L'iniziativa è vegnida refusada mo per pauc ed il tema n'è betg vegnì priorisà vinavant en il chantun Grischun. En il «Plan da rument dal Grischun 2016» (Uffizi per la natira e l'ambient) vegni finalmain fixà il suandant davart il tema dal littering: «*Il fenomen dal littering n'è tuttina betg primarmain in tema da rument, mabain in da la schubradad ed er da la segirezza en il spazi public. Littering è in problem social che occupa la gronda part da las burgaisas e dals burgais.*»

Sut quest aspect vegn la Regenza incumbensada:

- 1. d'elavurar in'analisa dal stadi actual en regard a la problematica dal littering;**
- 2. da mussar mesiras pussaivlas concernent l'infurmaziun e concernent ina prevenziun pli ferma (tranter auter er cun integrar las scolas e las generaziuns pli veglias, cun cumparsas en las medias socialas e.u.v.);**
- 3. da proponer eventualas mesiras legislativas chantunales che pussibilitassan da denunziar delinquents da rument;**
- 4. d'elavurar e da suttemetter al Cussegl grond in concept chantunal general davart la prevenziun e davart la reduenziun dal littering tras las persunas indigenas e tras ils giasts (tranter auter er cun resguardar soluziuns preventivas e legislativas d'auters chantuns).**

Tavau, ils 18 da favrer 2021

Widmer (Favugn), Casty, Salis, Atanes, Berther, Brandenburger, Buchli-Mannhart, Clalüna, Cramer, Danuser, Della Cà, Dürler, Ellemunter, Epp, Florin-Caluori, Flütsch, Föhn, Gugelmann, Hefti, Horrer, Kohler, Lamprecht, Loepfe, Müller (Favugn), Müller (Susch), Niggli-Mathis (Grüsch), Preisig, Rettich, Ruckstuhl, Tanner, Ulber, Widmer-Spreiter (Cuir), Pajic, Spadarotto